

Izveštaj sa 28. sjednice Općinskog vijeća

12.03.2015. godine održana je 28. sjednica Općinskog vijeća Ilijaš. Nakon što je s Dnevnog reda, povučen Prijedlog Odluke o finansiranju parlamentarnih grupa u Općinskom vijeću Ilijaš, vijećnici su potavljali vijećnička pitanja i upućivali inicijative. Na trećoj tački Dnevnog reda, našao se Izveštaj o radu Općinskog načelnika i Službi Općine Ilijaš za 2014. godinu. Uvodne napomene po pitanju ove tačke dao je Općinski načelnik: "Izveštaj o radu Općinskog načelnika i Službi Općine Ilijaš je opširan i transparentan dokument, na osnovu kojeg meritorno možete izvršiti uvid u rad Općinskog načelnika i Službi Općine Ilijaš. Iako je 2014. godinu okarakterisala politička kriza, deficiti budžeta na višim nivoima vlasti koji je otežavao i rad lokalnih organa, elementarne nepogode, koje su na području Općine Ilijaš prouzrokovale štetu veću od milion KM, praktično je realiziran Operativni plan Općinskog načelnika za 2014. godinu.

Nažalost, u 2014. godini nismo realizovali nabavku RTG aparata, ali je većina stavki premašila obim Operativnog plana. Najznačajniji realizovani projekti u 2014. godini je otvaranje JU OŠ "Stari Ilijaš", čime je Općina Ilijaš dobila još jednu Javnu ustanovu, i ispunili su se pedagoške standardi na području obrazovanja, renovirana je fiskulturna sala u JU OŠ "Srednje", u oblasti zdravstva otvoren je Centar za mentalno zdravlje, Dijabetološko savjetovalište, 24- satna dežura Hitne pomoći, i ovim je znatno poboljšana zdravstvena zaštita građana. Kada je u pitanju saobraćajna infrastruktura asfaltiran je put na dionici Pravoslavna crkva – Stari Ilijaš, rekonstrukcija i sanacija dijela saobraćajnice u MZ Ilijaš Grad, izgradnja parkinga na Banovcu, pristupni put za Industrijsku zonu "Luka", koji spaja dvije Industrijske zone, asfaltirano je preko 12 km lokalnih puteva. Realizovana su projekti u cilju rješavanja vodosnadbijevanja u Gornjim Malešićima i Gornjim Balbegovićima. Projekti Javne rasvjete u manjem obimu su realizovani. Kada je u pitanju poljoprivreda izdvojeno je oko 200.000,00 KM, ušli smo u realizaciju projekata za mala i srednja preduzeća sa SERDOM, i preduzeća koja zadovolje proceduru dobit će sredstva za nabavku opreme. U prethodnoj godini poboljšan je rad sa Službom za zapošljavanje Kantona Sarajevo. Uložena su značajna sredstva u rješavanje imovinsko-pravnih odnosa. Socijalni segment je značajno zastupljen, kako kroz Budžet tako i kroz razne organizacije, Crveni križ, Javna kuhinja. Izdavanje Monografije šehidima i poginulim borcima, uređenjem Spomen obilježja, otvaranjem Sportske plohe u Starom Ilijašu i realizacijom brojnih manjih Projekata doprinijelo je i to što je Bužet Općine Ilijaš u odnosu na 2013. godinu bio povećan za 25%" - rekao je Općinski načelnik g. Akif Fazlić. Uz kraću raspravu Izveštaj o radu Općinskog načelnika i Službi je usvojen. Potrebnu većinu glasova dobio je i Operativni plan Općinskog načelnika i službi za 2015. godinu. Općinski načelnik je istakao da je: "Operativni plan sačinjen na bazi finansijskih pretpostavki, postavljen je vrlo ambiciozno sa visokim ciljevima. Operativni plan je definisao aktivnosti, nosioce i rokove onoga što će se raditi u 2015. godini, a čijom realizacijom će se prije svega nivo infrastrukture u oblasti saobraćaja, vodosnadbijevanja, elektrosnadbijevanja i ostalih komunalnih funkcija, društvenih djelatnosti, ekologije i zaštite životne sredine podići na još veći nivo što će poboljšati uslove života stanovništva Općine Ilijaš. U 2015. godini predviđeno je asfaltiranje puta u dužini od 8 km kao i značajna rekonstrukcija postojećih puteva, izgradnja kanalizacione mreže u dužini od najmanje 3 km, dugoročno rješenje problema elektrosnadbijevanja kroz početak projektovanja nove TS 110, proširenje telekomunikacijskih mreža, proširenje javne rasvjete za oko 146 rasvjetnih tijela. Najznačajniji Projekat u 2015. godini će biti početak nadzidivanja zgrade Općine Ilijaš i zgrade Doma zdravlja čime će se stvoriti uslovi za rad Centra za fizikalnu rehabilitaciju i mentalno zdravlje kao i uslovi za rad Općinskog vijeća kao i obezbjeđenje dijela nedostajućeg kancelarijskog prostora za Jedinstveni općinski organ uprave. Projektima u oblasti privrede i poljoprivrede kao što je nastavak subvencioniranja poljoprivredne proizvodnje, programom plasteničke proizvodnje, uvođenjem novih poticaja i sl. aktivnosti stvorit će se ambijent i uslovi za novo zapošljavanje i ekonomski napredak Općine. U ovoj godini cilj je urediti korita rijeka Ljubina, Rača i Misoča i potok Povoče kao i sanirati najopasnija klizišta. Teška socio-ekonomska situacija iziskuje da socijalni programi budu u vrhu prioriteta našeg

djelovanja tako da će se i ovoj oblasti posvetiti puna pažnja".

Na ovoj sjednici usvojen je i Prijedlog Odluke o korištenju sredstava za otklanjanje posljedica prirodne nesreće i obnovu područja Općine Ilijaš zahvaćenih prirodnom nesrećom. Usvojeni su i prijedlozi odluka o neposrednoj pogodbi za prodaju neizgrađenog građevinskog zemljišta kao i Odluka o načinu i uslovima prodaje neizgrađenog građevinskog zemljišta. Usvojen je i Nacrt Odluke o usvajanju Regulacionog plana "Ljubinići-Ilijaš", i stavlja se na Javni uvid u periodu od 12.03.2015. do 09.04.2015. godine, a Javna rasprava na nacrt Regulacionog plana "Ljubnići-Ilijaš", Nacrt Odluke o provođenju Regulacionog plana "Ljubnići-Ilijaš" i nacrt Odluke o usvajanju Regulacionog plana "Ljubnići- Ilijaš" održat će se 10. aprila 2015. godine u Sali općinskog vijeća Ilijaš sa početkom u 14:00 sati.

Primjedbe, prijedlozi, sugestije i mišljenja svih zainteresovani subjekti planiranja, MZ-a, potencijalnih investitora, građana, vijećnika Općinskog vijeća Ilijaš dostavljaju se Općini Ilijaš, Službi za prostorno uređenje i stambeno komunalne poslove, koja organizuje i sprovodi javnu raspravu.

Na ovoj sjednici usvojeni su i rješenja iz imovinsko-pravnih oblasti, a potrebnu većinu nisu dobili prijedlozi Odluka o utvrđivanju novog građevinskog zemljišta i plana parcelacije za izgradnju apartmanskog naselja Ivančići i Ljubinići. Informacija o stanju kriminaliteta, javnog reda i mira i saobraćaja na području Općine Ilijaš za 2014. godinu i Informacija o radu Službe socijalne zaštite Općine Ilijaš za 2014. godinu primljene su k znanju.